

27 SEPTEMBRIE

**SLUJBA
SF. CUVIOASE
RAHILA
KOROTKOVA
DE LA
BORODINSK**

MINEIUL-RU



Месяца сентября в 27-й день

Преподобныя Рахили Бородинския

На малой вечерни

На Господи, воззвах: стихиры на 4, глас 1.

Подобен: Небесных чинов:

Небеснаго от юности блаженства вожделевши,/ презрела еси земная наслаждения,/ постом, бдением, молитвою украсившись,/ благодать от Бога прияла еси/ душевныя и телесныя болезни врачевати,/ и нечистыя духи прогоняти,/ и всем скорбящим предстательствовати,/ мати честная, Рахиле./ Темже твоими молитвами проси исцеления всем/ и велия милости.

Небеснаго Жениха Христа/ влекома желанием крайним, Рахиле,/ прешла еси волны мирских мятежей/ и, Богоматерь Хранительницу обретши,/ пристанища невлаемого достигла еси,/ идеже с лики мудрых дев веселишися/ и молишися о душах наших.

Небесным чином поревновала еси, / на земли
небесное жительство провождаючи, / и ангельских
сил служение таинственное / зрела еси во святилищи,
Рахиле. / Ныне же на Небесех несредственне, /
светолития Тройческаго наслаждающихся, / моли
спастися нам.

Слава, глас 5:

Мати Рахиле досточудная, / Небеснаго блаженства
вожделевши, / вместо богатства временнаго нищету
духовную избрала еси: / вместо земнаго обручника –
Жениха Небеснаго, / вместо сласти тленныя –
воздержание, / вместо покоя телеснаго – труды
постнические, / вместо тщеты мирския – премирную
жизнь. / Сего ради благодать Божия в тебе,
преподобная, почила есть. / Темже твоими
молитвами / сохрани верою блажащия тя.

И ныне, Богородичен, глас тойже:

Обрадованная, ходатайствуй Твоими молитвами /
и испроси душам нашим множество щедрот, / и
очищение прегрешений, молимся.

На стиховне стихиры, глас 2.

Подобен: Доме Евфрафов:

Дом духовный, / исполненный обильно /
добродетелей Божественных, / преподобная Рахиль
явися, / людие, да стецемся.

Стих: Дивен Бог во святых Своих, / Бог Израилев.

Агнице кроткая, / голубице чистая, / Рахиле
предивная, / Христа Пастыреначальника моли / о
совершающих память твою верно.

Стих: Честна пред Господем / смерть преподобных
Его.

Преподобных похвало, / Церкви украшение, /
обители твоя радование, / прими моления, мати, /
недостойных чад твоих.

Слава, глас и подобен тойже:

Возсия днесь священное твое торжество, / солнца
светлейшее, / сущия во тме души озаряющее, / мрак
бесовский всегда отгоняющее, / Рахиле досточудная.

И ныне, Богородичен, глас и подобен тойже:

Радуйся, Богородице Дево,/ радуйся, похвало
всея вселенныя,/ радуйся, Чистая Мати,/ радуйся,
Благословенная Владычице.

Тропарь писан на велицей вечерни.

На велицей вечерни

Блажен муж: **1-й антифон. На Господи, возвах:**
стихиры, глас 1.

Подобен: О, дивное чудо:

**О, дивное чудо!/ Исцелений новый источник/ в
земли Московстей открывается/ и благодати кладязь
неисчерпаемый/ Рахиль блаженная бывает./
Веселися, обителе Бородинская,/ таковое в себе
сокровище имущи,/ вернии, возопиим,/
милосерднаго Господа о сем благодаряще:/ молитвами
преподобных Рахили/ подаждь грехом нашим остав-
ление/ и душам нашим/ мир и велию милость.**

**Дивна милость Твоя, Богородице,/ покровом бо
Твоим верныя люди присно осеняеши/ и ныне
даровала еси крепкую заступницу и молитвенницу
теплую,/ благочестия поборницу неборимую,/**

обители святых похвалу и удобрение./ Темже, верных собори, на высоту возноситеся,/ ко преподобней вопиюще:/ преподобная мати Рахиле,/ Господеви молися/ даровати душам нашим/ мир и велию милость.

О, дивное чудо!/ Монашества Русскаго начальник/ преподобный Феодосий/ отроковицу юную благословляет,/ сия же является новая угодница Божия/ и молитвенница за Русь теплая./ Приидите, постниц собори,/ воззовем к наставнице нашей предивней:/ преподобная мати Рахиле,/ Господеви молися/ низпослати обители твоей/ мир и велию милость.

Твою всечестную память славят/ архиереев собори и вси людие,/ монаси и простии,/ силою бо божественною чудеса многая содеваеши/ и теми души наша веселия исполняеши,/ маловерных же в вере укрепляеши./ Приидите, празднолюбцы,/ лик духовный совокупльше, возопиим:/ о, Рахиле блаженная,/ Господеви молися/ мир миру даровати/ и земли нашей велию милость.

Ины стихиры, глас 5.

Подобен: Радуйся:

Радуйся, земле Российская, / уделе Богом
избранный, / яко в возрасте в тебе новая отрасль
винограда Христова, / плодами Духа верных
веселящая, / словесы премудрости насыщающая, /
богоносная и преблаженная Рахиль, / обители
Бородинстей похвала и радование, / недужным и
скорбящим скорая помощница / и пред Богом
непостыдная предстательница.

Дважды.

Радуйся, честная труднице, / от юности добре
подвизавшаяся, / ралом заповедей сердце свое
возделавшая / и пришедших к тебе не отвергавшая, /
наипаче же сих в делании наставлявшая. / Темже
ныне в Царствии Небеснем, / вечных благ
наслаждающихся, / молися Господеви / спастися
душам нашим.

Радуйся, к Богородице усердная молитвеннице, /
цвете чистоты и целомудрия, / преподобная мати
Рахиле, / отечеству нашему во дни гонений Богом

дарованная./ Ты, Христово исповедание пред
безбожными мужески явивши,/ многия люди к вере
Православней обратила еси./ Ныне же молим тя/ мир
мирови испросити/ и душам нашим велию милость.

Слава, глас 6:

Светлостью богоугодного жития твоего,/ верою
несумненною и любовью божественною,/ кротостью
нрава и милосердием/ просияла еси, яко звезда, на
тверди церковней,/ преподобная мати,
достоблаженная Рахиле,/ исцеления и чудеса
источающи./ И нас лучами света твоего озари,/ под
кров обители твоея прибегающих/ и празднующих
верою и любовью/ честную память твою.

**И ныне, Богородичен, глас тойже: Кто Тебе не
ублажит:**

**Вход. Прокимен дне. И чтения три
преподобническая.**

Премудрости Соломоновы чтение (глава 3):

Праведных души в руке Божией, и не
прикоснется их мука./ Непщевани быша во очесех
безумных умрети, и вменися озлобление исход их./ И

еже от нас шествие сокрушение, они же суть в мире./
Ибо пред лицом человеческим аще и муку примут,
упование их безсмертия исполнено./ И в мале
наказани бывше, великими благодетельствовани
будут,/ яко Бог искуси я, и обрете их достойны Себе./
Яко злато в горниле искуси их, и яко всеплодие
жертвенное прият я./ И во время посещения их
возсияют и яко искры по стеблию потекут./ Судят
языком, и обладают людьми, и воцарится Господь в
них во веки./ Надеющиеся Нань разумеют истину, и
вернии в любви пребудут Ему./ Яко благодать и
милость в преподобных Его, и посещение во
избранных Его.

Премудрости Соломоновы чтение (главы 5 и 6):

Праведницы во веки живут, и в Господе мзда их,
и попечение их у Вышняго./ Сего ради примут
Царствие благолепия, и венец доброты от руки
Господни,/ зане десницею покрывает я, и мышцею
защитит их./ Приимет всеоружие рвение свое, и
вооружит тварь в месть врагом./ Облечется в броня
правды, и возложит шлем, суд нелицемерен./

Приимет щит непобедимый, преподобие./ Поострит же напрасный гнев во оружие;/ споборет же с ним мир на безумных./ Пойдут праволучныя стрелы молниины,/ и яко от благокругла лука облаков, на намерение полетят./ И от каменометныя ярости исполнь падут грады,/ вознегодует на них вода морская, реки же потопят я нагло./ Сопротив станет им Дух Силы, и яко вихор развеет их,/ и опустошит всю землю беззаконие, и злодейство превратит престолы сильных./ Слышите убо, царие, и разумеите, навикните, судии концев земли./ Внушите, держащии множества, и гордящися о народах языков,/ яко дана есть от Господа держава вам, и сила от Вышняго.

Премудрости Соломоновы чтение (глава 4):

Праведник, аще постигнет скончаться, в покои будет./ Старость бо честна не многолетна, ниже в числе лет исчитается./ Седина же есть мудрость человеком, и возраст старости, житие нескверное./ Благоугоден Богови быв, возлюблен бысть, и живой посреде грешник преставлен бысть./ Восхищен

бысть, да не злоба изменит разума его, или лесть
прельстит душу его./ Рачение бо злобы помрачает
добрая, и парение похоти пременяет ум незлобив./
Скончався в мале, исполни лета долга./ Угодна бо бе
Господеви душа его, сего ради потщася от среды
лукавствия./ Людие же видевшие и не разумевше,
ниже положше в помышлении таковое./ Яко
благодать и милость в преподобных Его,/ и
посещение во избранных Его.

**На литии стихира храма, таже стихиры святых,
глас 2.**

Подобен: Киими похвальными венцы:

Киими похвальными венцы/ увязем Христову
угодницу,/ во дни испытаний Руси дарованную,/ яко
едину от древних подвизавшуюся,/ целомудрия
образ,/ воздержания правило,/ молитвы чистое
зерцало,/ пророчества даром украшенную,/
будущая, яко настоящая, провещавшую?/ Сию бо
воистину достойно бессмертных славы венцем/
венчает Христос Бог наш,/ имеяй велию милость.

Киими песненными добротами/ воспоим Рахиль премудрую,/ заповедей Христовых усердную хранительницу,/ Православия поборницу неборимую,/ покаяния проповедницу,/ инокинь неложную наставницу,/ заблуждших исправление,/ безбожнъя дерзости обличение?/ Еяже молитвами врагов шатания, Христе, низложи,/ имеяй велию милость.

Киими духовными песнями/ похвалим Рахиль предивную,/ в милосердии Небесному Отцу подражавшую/, нищих утешение,/ странных питательницу,/ кладязь чудес неисчерпаемый,/ исцелений реку изобильную,/ землю Московскую напоившую?/ Еяже предстательством, Христе Боже,/ спаси страну Российскую/ и души наша помилуй.

Слава, глас 8:

Приидите, празднолюбцы и иноков сословие,/ согласно воспоим преславную Рахиль:/ благочестия светлость,/ чистоты сокровище,/ постников похвалу,/ заповедей Христовых усердную делательницу;/ та бо, жива суци и по смерти,/ попечением своим нас не

оставляет,/ страждущим и немощным помогает,/ болезни тяжкия исцеляет/ и присно молит спастися душам нашим.

И ныне, Богородичен, глас тойже: Безневестная Дево:

На стиховне стихиры, глас 2.

Подобен: Егда от Древа:

Во обители Спаса потрудившия усердно,/ образ Христов в себе обновила еси/ и, ветхаго человека до конца совлекшия,/ на еже по подобию возшла еси,/ темже явилася еси/ наставница неложная/ Царствия Небеснаго взыскующим,/ и по отшествии от земных нас не оставляеши,/ присно молящися о душах наших.

Стих: Дивен Бог во святых Своих,/ Бог Израилев.

Всемиловитваго Спаса верная слуго,/ достохвальная мати Рахиле,/ потоки милости излила еси обильно/ всем притекающим к тебе с верою/ и алчущим отверзла еси утробы щедрот твоих,/ насыщающи пищую духовною и телесною./ Ныне на

Небесех,/ Хлеба жизни причащающихся,/ моли
спастися нам.

Стих: Честна пред Господем/ смерть преподобных
Его.

Крепость и мужество в напастех имущи,/ препо-
добная мати Рахиле,/ кроткое и непорочное житие
совершила еси,/ темже благодать неизреченну прияла
еси/ сущим в нуждах помогати,/ болящия исцеляти/
и молитися о душах наших.

Слава, глас 5:

Приидите, верных собори,/ восхвалим истинную
дщерь Царя Небеснаго:/ та бо, яко свеща негасимая,/
возсия во мраце лютаго безбожия,/ озаряючи души
верных светом любви божественныя./ И ныне,
Рахиле, предстательница наша непостыдная,/ моли
Христа Бога,/ да не отвратит от нас, грешных,/
пречистаго Лица Своего/ и наставит на путь
покаяния.

И ныне, Богородичен, глас тойже: Храм и Дверь еси:

На благословении хлебов тропарь, глас 5:

Яко маслина плодовита,/ возрасла еси во обители

Бородинстей,/ преподобная мати Рахиле,/ и плод
сторичный принесла еси,/ повелением Богородицы
всеусердно ближнему послуживши,/ кротостию и
любовию многих на путь спасения наставляющи/ и
добродетели научающи./ Темже светлым тя венцем
увенча Подвигоположник Христос Бог наш,/ Егоже
моли спасти и просветити души наша.

На утрени

**Бог Господь: тропарь святыя дважды. Слава и
ныне, Богородичен воскресен.**

По 1-м стихословии седален, глас 2:

**Больши сия любве никтоже имать,/ да кто душу
свою положит за други своя:/ сие воины
православнии на поли Бородинстем подвизашася и
кровь свою за землю Русскую пролияша./ Ты же,
мати преподобная, любовию подвигшися,/ многия
молитвы о них к Богу возносила еси,/ благочестие
веле показующи.**

Слава, и ныне, Богородичен, глас тойже:

Тя величаем, Богородице, вопиюще:/ радуйся,

Незаходимаго Света Мати,/ Ты бо носила еси в
недрех Твоих славы Господа.

По 2-м стихословии седален, глас 2:

Воинов православных память почитала еси
достойно,/ тии бо, Отечество земное от ига
защищающе,/ галлов прегордых силою Христовою
победиша./ Ты же, Рахиле достохвальная,/ на
невидимыя враги брань подъемши,/ противу полков
безбожных стала еси,/ люди земли нашея в вере
наставляющи/ и к Царствию Небесному управляющи.

Слава, и ныне, Богородичен, глас тойже:

Божественнаго естества общницы быхом Тобою,
Богородице Приснодево,/ Бога бо нам воплощенна
родила еси,/ темже Тя по долгу вси благочестно
величаем.

Величание:

Ублажаем тя,/ преподобная мати Рахиле,/ и чтим
святую память твою,/ ты бо молиши о нас/ Христа
Бога нашего.

Псалом избранный: Терпя потерпех Господа, и
внят ми, и услыша молитву мою.

По полиелее седален, глас 2:

Бронею оболкшися целомудрия/ и веры шлем на главу возложивши,/ палицею молитвы непрестанная/ сокрушила еси главы мысленных врагов,/ оружице Христова непобедимая,/ страсти же плотския мечем воздержания и смирения посекала еси./ Темже Христос озари тя пророчества даром и чудес светлостьми/ и ныне, предстоящи Престолу Божию, преподобная мати Рахиле,/ моли о душах наших.

Слава, и ныне, Богородичен, глас тойже:

Моление теплое и стена неборимая,/ милости Источнице, мирови Прибежище,/ прилежно вопием Ти:/ Богородице Владычице, предвари/ и от бед избави нас,/ едина вскоре предстательствующая.

Степенна, 1-й антифон 4-го гласа. Прокимен, глас 4: Дивен Бог во святых Своих,/ Бог Израилев. Стих: В церквах благословите Бога,/ Господа от источник Израилевых. Всякое дыхание: Евангелие от Матфея, зачало 104.

По 50-м псалме стихира, глас 6:

Светлостию богоугоднаго жития твоего,/ верою несумненною и любовью ко Христу,/ кротостию и милосердием/ просияла еси на тверди церковней,/ преподобная мати, достоблаженная Рахиле,/ исцелений токи и чудес зари испускающи./ И ныне вонми молению нашему,/ под кров обители твоея прибегающих/ и празднующих верою и любовью честную память твою.

Канон Богородице со ирмосом на 6 и преподобней на 8, егоже краегранесие: Христова агнице Рахиле, моли Бога о нас. Глас 4.

Песнь 1

Ирмос: *Отверзу уста моя,/ и наполнятся Духа,/ и слово отрыгну Царице Матери,/ и явлюся, светло торжествуя,/ и воспою, радуясь, Тоя чудеса.*

Христе Всецарю,/ ум наш просвети и уста отверзи к прославлению Твоему/ и сподоби достойно воспети истинную и добрую служительницу Твою, Рахиль блаженную.

Русския Церкви молитвенница и печальница

явилася еси, мати честная,/ во дни лютых гонений
Отечеству нашему дарованная,/ молися о нас, память
твою совершающих.

Иисуса Пастыреначальника агница кроткая и
предивная явилася еси, мати Рахиле,/ темже сердцу
моему кротость подаждь,/ уму же чистоту и
помыслом целомудрие.

Словом Божиим, яко водою живою, жаждущую
душу твою напоила еси/ и учении отеческими
обильно напиталася еси, преподобная,/ темже, яко
агница чистая, стаду избранных сочетавшись,/ моли
спастися душам нашим.

Богородичен: Мати Пресвятая, рождшая Спаса,/
слепотствующий грехми ум наш просвети,/ да
достойно воспоем угодницу Твою.

Катавасия: *Отверзу уста моя:*

**Ин канон преподобней, егоже краегранесие по
алфавиту. Глас 5.**

Песнь 1

Ирмос: *Спасителю Богу,/ в мори люди
немокрыми ногами наставльшему/ и фараона со*

*всевоинством потопльшему, / Тому Единому поим,
яко прославися.*

Ангелов Творче и Господи сил, / отверзи нам ум и
уста на похваление преславных угодницы Твоея, /
дарованных во дни испытаний Отечеству нашему.

Божественною любовью распалаема, Рахиле
преподобная, / ум свой горе устремила еси / и, сетей
многомятежнаго мира избегши, / Небесному Жениху
сочеталася еси.

Владычицу Пречистую, яко Путеводительницу
неложную, обретши, / странствие земное неблаженно
шествовала еси, / темже, не имущи zde
пребывающаго града, / грядущий в Царствии
Небеснем обрела еси.

Богородичен: Глубину и высоту непостижимыя
премудрости Божия / Тобою познахом, Дево
Пречистая, / и во Обители Небесныя путь Тобою
обретохом, Одигитрие Благая.

Песнь 3

Ирмос: Твоя песнословцы, Богородице, / Живый и
Независтный Источниче, / лик себе совокупльшия,

*духовно утверди,/ в Божественней Твоей славе/
венцев славы сподоби.*

Тихостию нрава и кротостию украшена,/ от юности Христу уневестилася еси, Рахиле преславная,/ вся красная мира сего ни во что же вменивши,/ и ныне срадуешься на Небесех с лики преподобных жен.

Очи твои выну ко Господу имущи/ и все упование на Него возложивши, мати преподобная,/ крест свой всеусердно понесла еси/ и плоды добраго исповедания веры явила еси.

Веру истинную, любовь нелицемерную и надежду несумненную имущи,/ дом Божий всею душею возлюбила еси, горлице чистая,/ ныне же веселия нескончаемаго наслаждаешься во дворех Господа твоего.

Адаманта крепче сердце твое, Рахиле, показала еси,/ егда дом родительский любви ради Божия оставила еси,/ сладострастие всякое отринувши/ и плотскому обручнику предпочетши Небеснаго Жениха.

Богородичен: Ева и Адам осуждения избавистася
Тобою, Чистая,/ с нимиже и мы припадаем Ти:/
печальныя наша слезы ныне на радость преложи/ и
от напастей свободи.

Ин

Ирмос: *Силою Креста Твоего, Христе,/ утверди
мое помышление,/ во еже пети и славити/
тридневное Твое Воскресение.*

Добродетелей пресветлый храм явилася еси,
Рахиле преславная,/ благодатию Божественною
озаряемый,/ в земли же Русстей напоследок дней
явленный,/ темже светом твоих чудес и нас озари.

Еленю, ищущу жажду утолити, подобящися, о
мати,/ от земли, изсохшей добродетельми, востекла
еси на пажити небесныя к Богу Крепкому, Живому/
и, яко древо, насажденное у источник вод
Божественных,/ плод обилен принесла еси.

Житие твое дивно бысть воистину, мати
преподобная,/ от юности бо Богу угодили возжелала
еси./ Темже, буешь юности и желания плотская
отвергши,/ мудрость старческую стяжала еси.

Богородичен: *Зол всяческих избави верою к Тебе прибегающих, Дево Пречистая,/ и здравие даждь, Отроковице, и лютых избавление,/ яко да благодарственно присно славим Тя.*

Седален, глас 3:

Крайним желанием по лестнице добродетелей востекши,/ сосуд избран благодати Святаго Духа явилася еси/ и источник исцелений неоскудеваемый./ Ныне же, предстоящи Престолу Владыки твоего, преподобная мати Рахиле,/ не остави нас молитвами твоими.

Слава, и ныне, Богородичен:

Божественная Палата была еси Слова, едина Пречистая Дево Мати,/ чистотою ангелы превозшедшая./ Мене же, паче всех грехами осквернена,/ очисти молитв Твоих Божественными водами,/ подаючи, Чистая, велию милость.

Песнь 4

Ирмос: *Седяй в славе на Престоле Божества/ во облаце легце,/ прииде Иисус Пребожественный/*

Нетленною Дланию и спасе зовущия:/ слава, Христе, силе Твоей.

Ангельским ликом подражаючи в житии твоём, Рахиле,/ яко безплотная в мире сем пожила еси/ и, образ Божественный в себе соблюдши,/ на еже по подобию возшла еси,/ телесныя и душевныя страсти до конца искоренивши.

Града Киева, еще отроковица сущи, со тщанием достигла еси/ и, явления преподобнаго Феодосия сподобльшися,/ благословение от него на путь иноческий прияла еси./ Егоже водительством направляема,/ в Небесный Град возшла еси.

Начало жития иноческаго в пределах Смоленских положила еси,/ славы же человеческия бегаючи,/ путь странничества избрала еси/ и обители многия обтекла еси./ Таже, в веси Бородинстей водворившися,/ Московския пределы чудес зарями просветила еси.

Иго благое послушания понесши/ и ближним послуживши неленостно, мати Рахиле,/ велиарову гордыню хриstopодражательными нравами твоими

низложила еси./ Темже благодать Святаго Духа на тя богато излилася.

Богородичен: Внуши глас раба Твоего,/ требующаго Твоея помощи, Богомати, Упование мое,/ услыши мя и напастей исхити.

Ин.

Ирмос: *Услышах слух силы Креста,/ яко рай отверзся им,/ и возопих:/ слава силе Твоей, Господи.*

Зрительница неизреченных откровений явилася еси, Рахиле,/ Самой Владычице мира, к Тебе пришедшей, поклонившись,/ и Сию Хранительницу девства твоего обретши.

Истинному смирению Христову подражаючи,/ путь странничества восприяла еси, блаженная,/ и, радуящися, богатства имений до конца отверглася еси./ Сего ради сопричте тя Подвигоположник жребию избранных.

Иерусалима земнаго в странствии твоем достигши, преславная,/ вольным страstem и тридневному воскресению Владычню поклонилася еси./ Ныне же Небесное гражданство восприимши,/

лицем к лицу зриши Господа твоего./ Молися и нам в кровех Небесных водворитися.

Богородичен: Кладязь неископан вод животворных Ты еси, Богородице,/ каплями Твоего милосердия окропи нас, истаявших грехом,/ молит Тя преподобная Рахиль.

Песнь 5

Ирмос: Ужасошася всяческая/ о Божественной Славе Твоей:/ Ты бо, Неискусобрачная Дево,/ имела еси во утробе над всеми Бога/ и родила еси Безлетнаго Сына,/ всем воспевающим Тя/ мир подавающая.

Целомудрия столп одушевлен явилася еси, матери Рахиле,/ на камени заповедей утвердивши сердце твое,/ темже лица дев в невестник Христов ввела еси/ и на стезю спасительную заблудших наставила еси.

Елей милосердия Божественный излила еси обильно,/ совершенству подражаючи Небеснаго Отца,/ и сосуд избранный любви Христовой была еси, Рахиле,/ верою к тебе притекающим.

Ризами светлыми девства украсилася еси,
преподобная мати,/ ревностию же Божественною
разжегшися,/ в Горняя простиралася еси, дольняя
забывающи.

Алтарю Господню прилежавши неленостно,/ храм
Духа Святаго душу твою соделала еси,/ темже зрети
чины безплотных и невечерний свет Божественныя
благодати сподобилася еси.

Богородичен: Дево Пречистая, Владычице,/
скверну души моя очисти и раны греховныя
исцели,/ ускори на помощь и спаси мя.

Ин.

Ирмос: Утреннююще, вопием Ти:/ Господи, спаси
ны,/ Ты бо еси Бог наш,/ разве бо Тебе иного не знаем.

Ластовице сладкоглаголивая, Рахиле,/
Божественными словесы воспитана,/ ловца
коварнаго мудре избегла еси/ и, страсти презревши,/
от земли греха возлетела еси:/ помози и нам,
преподобная, сетей диавольских избавитися.

Монашества русскаго начальник, преподобный
Феодосий,/ воистину бысть от Бога дарован ти, яко

хранитель и наставник,/ сего ради розга честная
явилася еси,/ к лозе привитая отеческих преданий.

Нощи неверия во Отечестве нашем сущей и бедам
умножившимся,/ показа тя Господь свещу,
добродетелей путь спасительный озаряющую,/
питательницу, духовным голодом томимых
насыщающую,/ и молитвенницу, огонь страстей
угашающую.

Обители твоея разорение видящи,/ скорби и
печали исполнилася еси, преподобная мати,/ обаче в
молитвах о месте сем не оскудевала еси./ Ныне же,
обновлению пришедшу, радуешься,/ чудеса точащи
независтно всем, с любовью почитающим тя.

Богородичен: Приснодево и Мати, Госпоже
Пречистая,/ от мысленных наветов свободи нас,/
души наша просвещаючи Светом из Тебе
возсиявшим.

Песнь 6

Ирмос: *Божественное сие и всечестное/
совершающе празднество,/ богомудрии, Богоматере,/*

*приидите, руками восплецим,/ от Нея рождшагося
Бога славим.*

Хлебов умножением прослави тя Господь, Свою
угодницу,/ и восстающих на тя посрами,/ ты же, о
мати честная, подражающи Владыце твоему,/
никогдаже алчущия и жаждущия оставила еси
лишены.

Истины Божественныя ралом возделавши душу
твою/ и семена всеявши в ню добродетели,/
благодати пожала еси плод сторичный,/ егда оскуде
на Руси преподобный/ и умалися истина от сынов
человеческих.

Любовию Христовою объяла еси
многострадальную землю Русскую, от беззаконник
поругаемую,/ и молитвенница неусыпающая явилася
еси к Богу, мати Рахиле,/ темже даром пророчества
обогасти тя Христос.

Едино на потребу ищущи и ко Единому
взирающи,/ правды Божия присно алкала еси/ и о
пище временней небрегла еси,/ темже на Небесех

ныне бессмертныя трапезы с веселием
наслаждаешься.

Богородичен: Отверзи мне двери жизненные
вскоре, Благая Вратарнице,/ и Царствия Небеснаго
наследника покажи мя, раба Твоего,/ и
Божественныя славы святых сопричастника.

Ин.

Ирмос: *Обыде мя бездна,/ гроб мне кит бысть,/ аз же возопих к Тебе, Человеколюбцу,/ и спасе мя десница Твоя, Господи.*

Ратники православныя, противу врагов Отечества
подвизавшыся,/ в молитвах своих неустанно
поминала еси, преподобная мати,/ и сама ратница
духовная показала еси,/ невидимому врагу
противоставши/ и леть безбожия мужески
обличивши.

Славою и честью Господь сил увенча тя,
оружницу Свою добропобедную,/ и воинству
Небесному сопричисли,/ ты же, в Церкви
торжествующей с лики святых мученик Престолу

Божию предстоящи,/ за воинство земное молитвы приносиши.

Трапезе братстей неленостно послужила еси, Рахиле,/ смирению Христову подражаючи,/ от Негоже почеть Горняго звания восприяла еси/ и дарами благодати обогатилася еси, пречудная./ Ныне же, трапезе нетленней приобщающися,/ всякия скудости нас избави.

Утешение от Божественных словес требующим подавала еси, Рахиле премудрая,/ такожде и от брашен, тобою благословенных, истече сладости поток,/ алчущих насыщай и недужных исцеляяй.

Богородичен: Фарисею, гордостию ослепленному, уподобихся,/ возношаяся присно,/ и в глубину безмерных прегрешений впадох./ Ты же, Едина Чистая,/ покаяние всецелое даруй ми и спаси мя.

Кондак, глас 2:

Агнице кроткой тезоименита,/ матери Рахиле,/ чистотою Богу угодила еси/ и, заповеди Господни исполнивши,/ духовных дарований сподобилася еси,/ и ныне исцелений токи изливаеши/ верою

приходящим к тебе и вопиющим:/ моли,
преподобная, Владыку Христа/ и Пречистую Матерь
Его/ спастися душам нашим.

Икос:

Ангелов Творец и славы Господь,/ дарова ты, матери
Рахиле, во дни смуты и мятежа/ скорбным утешение
и малодушным укрепление,/ да, видяще
равноангельное житие твое и чудес струю выну
текущую,/ веру Православную небоязненно
исповедают,/ тебе же благодарственно воспевают
похвальную песнь сие:

Радуйся, звездо, во мраке безбожия светло
возсиявшая;

радуйся, житием твоим Солнце Правды, Христа,
проповедавшая.

Радуйся, во времена гонений лютых за правую
веру брань мужески подъемшая;

радуйся, новомучеников Церкви Русския
сопричастнице.

Радуйся, всеусердно заповеди Господни
возлюбившая;

радуйся, лестницею добродетелей в Царствие
Небесное востекшая.

Радуйся, на земли ангельски пожившая;
радуйся, от Отца Небеснаго венец нетленный
приемшая.

Радуйся, падших к покаянию наставление;
радуйся, скорбящих от бед избавление.

Радуйся, о воинстве православнем молитвеннице
теплая.

радуйся, за Русь Святую предстательнице
непостыдная.

Радуйся, матери Рахиле, обители Бородинския
похвало и радование.

Песнь 7

*Ирмос: Не послужиша твари богомудрии/ паче
Создаваго,/ но, огненное прещение мужески
поправше,/ радовахуся, поюще:/ препетый отцев
Господь и Бог,/ благословен еси*

Молитвою и постом, преподобная матери,
сопротивоборца одолела еси/ и многих от
мучительства его избавила еси,/ победную песнь

поющи: / благословен Бог отец наших.

От земных к Небесным преселившись, мати честная, / нетленных благ наслаждаешься, / со всеми святыми немолчно песнь поющи: / препетый отецв Господь и Бог, благословен еси.

Летнюю память твою совершающих, Рахиле блаженная, / соблюди от всякия неприязни и демонскаго омрачения, / покрывающи молитвами твоими вопиющих: / отец наших Боже, благословен еси.

Источник воды живья содела тя Господь, мати Рахиле, / в пустыни неведения ходящим. / Темже с верою притекающих к тебе любовию ороси, поющих: / отец наших Боже, благословен еси. **Богородичен:**
Кроплением милости Твоея, Дево Богорадованная, / углие погаси моих страстей / и угасший светильник сердца моего возжги, / златый Свещнице, Пренепорочная.

Ин.

Ирмос: *В пеци огненной / песнословцы спасый отроки, / благословен Бог / отец наших.*

Хвалу тебе возносящих не презри, мати
преподобная,/ но милости излей обычно,/ скоро
заступаючи и от бед избавляючи зовущих:/
препетый отцев Господь и Бог благословен еси.

Отступников неистовство сила Божия укроти
твоею молитвою, мати Рахиле,/ и буесловцев мирских
посрами,/ сего ради благодарственно вопием:/ отец
наших Боже, благословен еси.

Основание благочестия твердое/ в сердцах чад
твоих положила еси, богомудрая,/ и, на подвиг
исповеднический тех наставивши,/ моление многое
возносила еси:/ отец наших Боже, благословен еси.

О, твоего смирения и кротости!/ О, воздержания
и совершенного нестяжания, Рахиле пречудная!/
Воистину изобильную благодать Духа Святаго прияла
еси, поющи:/ отец наших Боже, благословен еси.

Богородичен: Церковь Тя освященную показа,
Дево Пренепорочная,/ Бог, вселившийся во утробу
Твою./ Егоже присно моли соблюсти невредимы рабы
Твоя.

Песнь 8

Ирмос: *Отроки благочестивыя в пещи/*

Рождество Богородичо спасло есть;/ тогда убо образуемое,/ ныне же действуемое,/ вселенную всю воздвизает пети Тебе:/ Господа пойте, дела,/ и превозносите Его во вся веки.

Благодатное утверждение немощствующим бысть слово твое, Рахиле предивная,/ и лечба безмездная молитва твоя,/ темже, воспевающе тя,/ Бога превозносим во веки.

Орган славословия Божественнаго соделала еси сердце твое, мати честная,/ душу же храм Духа Святаго,/ непрестанно молитву творящи и взывающи:/ дети, благословите, священницы, воспойте,/ людие, превозносите Господа во веки.

Глас ангельский возвести продолжение дней твоих,/ да не престанеши в спасительном делании твоём,/ темже покаяния проповедница и милосердия Божия провозвестница явилася еси, мати Рахиле,/ непрестанно ко Господу взывающи:/ Тя превозносим во вся веки.

Агницу кроткую посреде волков посла тя
Христос,/ ты же, силою Божиею хранима,/ прещений
безбожных не убоялася еси/ и, на стези спасения
верныя наставляющи, научала еси взывати:/ Господа
превозносим во вся веки.

Богородичен: Испещрена рясны златыми, яко
Царица,/ Царя и Бога одесную ныне предстоиши,
Владычице,/ молящи о рабех Твоих.

Ин.

Ирмос: *Из Отца прежде век рожденного Сына и
Бога/ и в последняя лета воплощенного от Девы
Матере,/ священницы, пойте,/ людие, превозносите
во вся веки.*

Чудотворений твоих светом Московстии предели
осветишася,/ хвалится тобою весь Бородинская,/
обитель же Спасова, память твою, Рахиле,
празднующи, зело украшается, зовущи:/ Господа
пойте, дела, и превозносите Его во веки.

Шествие твое дивно бысть воистину, мати
честная,/ ты бо, ангельское жительство
провождаящи,/ добродетелей лестницею от земли на

Небо возшла еси/ и с лики святых сочеталася еси./ С нимиже ныне вопиеш:/ Господа пойте, дела, и превозносите Его во веки.

Щедродателю Богу подражаючи, мати Рахиле,/ всякаго приходящаго с любовью принимала еси,/ и никтоже от тебе тощ и неутешен отыде,/ но радование бысть видение лика твоего всем вопиющим:/ Господа пойте, дела, и превозносите Его во веки.

Юродством Христа ради буйство мира сего мудре посрамила еси, преподобная,/ темже, поношения мужественне претерпевши,/ веру совершенну явила еси, зываючи:/ Господа пойте, дела, и превозносите Его во веки.

Богородичен: Яко воистину Благодательница сущи,/ богатящая земнородных,/ и спасения Дверь, в Жизнь вводящая, Дево Богомати,/ присно предстательствуй о молящихся Тебе.

Песнь 9

Ирмос: *Всяк земнородный/ да възиграется, Духом просвещаемь,/ да торжествует же Безплотных умов*

*естество,/ почитающее священное торжество
Богоматере,/ и да вопиет:/ радуйся, Всеблаженная
Богородице,/ Чистая Приснодево.*

Осветися лик твой, преподобная, неизреченным светом,/ егда преставление твое в Небесныя обители приспе,/ и радости премирныя исполнилася еси,/ зрящи райскую доброту несказанную.

Невестник Христов возрадовася/ и райския врата отверзошася тебе, Рахиле,/ праведных и преподобных лица сретоша тя, вопиюще:/ Се Жених Безсмертный спасительный венец тебе дарует.

Ангелом явилася еси собеседница, мати честная, во плоти сущи,/ темже по преставлении ликом Небесным сопричте тя Христос,/ Егоже всем сердцем возлюбила еси.

Светолитием Святыя Троицы на Небесех ныне наслаждающихся/ и пищи нетленныя насыщающихся,/ не остави нас, сырых, преподобная,/ но, матернее рачение о чадах имущи,/ обитель твою сохрани.

Богородичен: О, пречудная Мати Божия,/ возсияй ми покаяния зарю/ и разреши мрак окаянныя моя

души,/ и отжени, Дево, лукавая помышления сердца моего.

Ин.

Ирмос: *Тя, паче ума и словесе Матерь Божию,/ в лето Безлетнаго/ неизреченно рождшую,/ вернии, единомудренно величаем.*

Языком нечистым ти вещая, преподобная, обретохся непотребен,/ обаче не презри моления моего,/ но исправити потщися,/ благосердием твоим Владыку умоляющи о грешнем рабе.

Псалмы и песньми обитель Бородинская славословит тя, Рахиле,/ твоими бо молитвами обновися,/ и инокинь лики созывает Спасу послужити непорочным житием,/ тебе, мати преславная, подражающе.

Фимиам честен бысть житие твое, Рахиле преподобная, к Небеси восходяй/ и на земли сущим благоухание источай./ Темже зловоние страстей от нас отжени и в добродетели укрепи.

Богородичен: Иссопом молитв Твоих окропи,
Дево,/ иссохшее страстьми сердце мое,/ да прозябнет
в нем спасительный плод покаяния.

Светилен:

Богоугодным житием твоим, Рахиле преподобная,/ просвети души наша и путеводствуй к свету боговедения,/ да не погибнем люте,/ тя бо свещу пресветлую имамы во тьме греховней пребывающии.

Слава, и ныне, Богородичен:

Светом Твоим озари мя, Пренепорочная,/ рождающая Свет Непреступный,/ разжени облаки страстей моих,/ и от тьмы неслетлыя исхити,/ и Божественнаго света сподоби,/ яко да пою Тя, Мати Дево.

На хвалитех стихиры на 4, глас 8.

Подобен: О, преславнаго чудесе:

О, преславнаго чудесе!/ Луг духовный/ на Святей Руси,/ новыми цветы украшается,/ новомученики и исповедники,/ с ними же и ликом преподобных,/ ихже молитвами, Христе Боже,/ веру Православную в

земли нашей укрепи/ и спаси души наша, яко
Милосерд.

О, преславнаго чудесе!/ Небесе и земли Царица,/
землю Русскую покрывающая,/ угодницу Свою
благословляет/ вспоможение скорое и чудное
подавати/ милости просящим./ Мы же, таковому
благосердию дивящися,/ радостию возопиим Христу
Богу нашему:/ спаси души наша, яко Милосерд.

О, преславнаго чудесе!/ Плодовит виноград
обитель Бородинская бывает,/ тамо бо Рахиль
преподобная/ исцелений вино источает,/ силою
Божиею чудодействующи преславно:/ приидите,
православнии людие,/ воспоим новую угодницу/ и
теплую молитвенницу,/ Спаса о нас умоляющую.

О, преславнаго чудесе!/ Благоуханный крин
Церкве наша/ Рахиль блаженная явися,/ образ
чистоты и смирения показующи./ Райдуся, земле
Московская,/ священницы и иноцы ликуйте,/ людие
веселия исполнитеся/ и новой угоднице Божией
поклонитеся,/ благодать бо Духа Святаго в ней
возсия.

Слава, глас 6:

Русстей земли от безбожник мучимей,/ яви тя
Господь, преподобная мати Рахиле,/ твердую
проповедницу веры Православныя/ и наставницу
благочестия мудрую,/ исполнену любви и
милосердия./ О, чудотворице предивная,/ моли
Христа Бога,/ да укрепит нас в духовном подвиге/ и
спасет души наша.

И ныне, Богородичен: Богородице, Ты еси Лоза
истинная:

Славословие великое. И отпуст.

На Литургии

**Блаженны, первого канона песнь 3-я и второго
песнь 6-я. Прокимен, глас 4: Дивен Бог во святых
Своих,/ Бог Израилев. Стих: В церквах благословите
Бога,/ Господа от источник Израилевых. Апостол к
Галатам, зачало 208. Аллилуиа, глас 1: Терпя потерпех
Господа,/ и внят ми, и услыша молитву мою. Еванге-
лие от Луки, зачало 33. Причастен: Радуйтесь,
праведнии:**